

民國華縣志

鞏縣志卷十三

邑人劉蓮青  
纂輯

邑人劉鎮華鑒定

邑人劉鍊海參閱

固始萬自逸讐校

人物志下

劉新蘭

新蘭字言如號春畹廩生神堤人敦品礪行言笑不苟性嗜學詩文噪一時每應試輒冠其曹所作爭相傳寫溫縣段晴川致仕歸聘課子弟生徒來者日衆數年之閒成就

頗多全家幾六十口六世同居人多豔之

采訪

劉銘新

銘新字警吾號慎齋廩貢生北山口人淳樸敦古處父卒事繼母蔣特摯幼慧迭從名師研經修辭學識宏廣於淡虛勘發奧義名家子弟執贊恐後精選經解諱諱開導人有片長輒記錄卽村氓野老言行確有經驗者亦必詳登諸冊家不中贊舌耕所得轉以濟人歿後諸弟子伐石誌

德采訪

曲沼

沼字映臺同治壬戌舉人居醴泉村少有器識風骨凜然

爲文別樹義法有文壇飛將之稱喜習柔術時舉以授生徒以州同需次江蘇蘇藩某喜沼能文且豔其與江督有舊兩次餽金聯歡俱卻謝某銜之膜置焉先是上官差以事意存調濟沼覓同列某代事竣酬以金沼返之江寧知府某聘閱試卷贈金百餘餅沼亦堅卻其清操多類此補通州州同陋規悉行革除而獄審訟理案無留牘州紳頗爲萬家生佛采訪

狄坦

坦字公度副戚豐已未解試紙房人世業農伯父憐坦才助其學一日曝麥遇雨衆急往收穫坦亦擁篲往伯父呵

其廢學坦感之益加淬勵弱冠遊庠聲聞卓著生平和光同塵不自矜重捻匪擾輦糾集各村築砦講山並自備資糧辦團練率衆防堵地方恃爲金湯先是李棠階講學河朔坦往受業探討立身行己之方始悟學從事見事不誤學由是所造益宏采訪

張啟元

啟元字會貞號伴梅縣學生瑤灣人原籍汨水父鳳池於嘉慶閒遷輩幼讀書慨慕古人學宗陸王嚴義利辨遇倫常齟齬愈加敦篤無纖毫異難意常以色與氣爲難制兢兢致力於室慾家素貧時或斷炊然不受人憐入庠後舌

耕餬口不復應試或問故曰吾性拙量狹不堪從政耳惡惡最嚴憚與劣者居聞語輒色變甚或拂衣去與同里李逢源互相砥礪交最深遇辨論不合或至徹夜爭時人兩頌之雅好詩文著有效贊集外應隨筆餘多散佚采訪

### 李逢源

逢源字淵甫布衣瑤灣人性溫厚寡介於和猝遇若無能久則莫窺涯涘讀書潛體默會不尙諷誦於羣經中尤邃於易涵泳探討亹亹不倦或欲領其奧窓所談皆眼前粗淺語叩其故始稔易本平易彼談玄說妙者乃故高其幟以惑人耳教人不限流品凡以虛心來者罔不諄諄詰誠

若其言行足法卽語出樵牧亦必賞歎褒錄一生不習制  
藝應科目與同里張啟元聲名相埒著有周易爻辨晚年  
好誦內典采訪

李大忠

大忠布衣夾津口人穎異豪爽父病瘞數年不起大忠左  
右侍奉好讀史傳借鏡古今人物制度以斲得心措行顧  
不善詞章不喜訓詁終其身未嘗與試炙其教者往往率

德改行采訪

席寅賓

寅賓字曰陽縣諸生侯地人少承庭訓曉然詩書大義長

益攻苦文名巍然設教四方嚴課程謹繙墨舞儒釋道界說精確明晰有負郭田數畝艱於事畜舌耕外不預他事處世是非皭然不作含糊模稜態一時名流多稱之采訪

孫文師子道恕

文師字景周縣學生魯村人以孝聞鄉里繼母龔氏九十一餘猶服養周至有族子忤親文師召之家爲講古來孝親故事適母龔在側文師委曲護持痛癢若一體族子目擊心動自是改行文師少績學四十餘博青衿鄉居教授每舉古人嘉言懿行爲後生子弟勸少年敬畏過其門必肅衣裳步履一日散步隴頭遇盜踞樹竊果急引退或詰其

故曰吾不欲與若輩見設墮落兩病也享壽八十有二子

道恕采訪

道恕字子忠號懲齋光緒乙亥舉人幼質魯艱於誦讀然堅毅不懈學識日增初因家貧有祿養志及春闈再躡雙親相繼逝乃絕意進取生平辦香陽明晚復孜孜於孫夏峯馬平泉竭力殫精深造有得嘗曰寧爲古人迂勿爲今人巧可想見其爲人矣著有周易集解五卷四書合輯

卷樸麗子正續集批評

卷采訪

焦書彥

書彥字藜閣張嘴寨人以廩貢署遂平教諭天性誠篤事

全繼母皆謹順胞弟四人曲盡友愛有大被風肄業大梁書院文章有根柢中牟倉景恬器之延課子弟丁丑歲荒還自汴卒於滎陽客邸采訪

董以威

以威字惠夫號石齋侯地人光緒己丑舉人少負不羈才薄曲學腐儒卓然有志於聖賢沈浸典墳兼研陸王學於紫陽四書集注多所摘發爲文根柢先正聲價重一時年五十六得選貢又四年舉於鄉迭主東周汴源河陽嵩陽各書院門下濟濟因材裁成著有論語心傳十卷大學申庸心錦二卷心花偶粲二卷亦不窺園詩文集卷子乃

瀛同舉己丑鄉榜

采訪

張燮

燮字調元號嵩麓歲貢生居乾溝寨少英異奮勵詩書手錄載籍以寸計者百餘卷任舉篇章皆心與口化喜窮經於宋儒義理外兼研漢唐訓詁以爾雅爲文字總匯勤力探討文譽日隆既客京師歷齊趙所至結納碩彥藉以廣搜訪資見聞如是者十餘年晚歲訓導沈邱一意啟迎後生嚴杜請干去後沈士猶感慕不置

采訪

胡永基

永基字孚休布衣居南滹沱村以淳謹著聞事再從父撫

三從弟恩誼備至與人交外馴良內剛果義利之辨毫髮

必慎

采訪

劉公書

公書七里鋪人至性過人讀書不應試父砌凡父生前未竟事竭力踰行竣必告父主蓋不忍死其親也家無中人產而清懷介節尺寸不苟以布衣終

采訪

周孚先

孚先字允若太學生初與胡芊秀爲友既愧不逮遂執贊稱弟子素耽諷誦隨所居丙夜不休聲徹戶外晚歲鑽研益力購古籍千卷築室下帷寢饋其中

采訪

程佐堯祖元爵

佐堯字伊輔號蓉溪歲貢生程纂人弱不好弄讀書窮理日夕不懈於經學外喜研宋五子書持身主敬居恆正襟危坐寒暑未嘗解衣設帳有年門下化之生徒行街衢望而知爲從某師也祖元爵字尊一號鳳崖性樂施予卹貧如不及時助人婚葬遇大差役輒出資代辦後倡築仁里差局其卒也無親疎咸涕零采訪

劉天德

天德字叔達益家窩人少貧失學八歲喪母繼母毛蠻積難事嗣遭父喪家徒四壁遺債數百金當行乞繼下媒并

作苦工得食供母母不怡輒跪受杖退無怨言常從族兄某業航積所得悉以還債事繼母衣食從所欲兄弟歿收養遺孤魏氏甥跛且貧孫氏妹貧而喪明撫卹兩甥恩義周至曾出囊金買宗祠地基其卒也董事廉以威爲誌墓

采訪

張凌雲子志省

凌雲字翰起號慎軒歲貢生寺灣人太學生作睿子生而醇篤孺慕極切父逾六旬得瀉疾恆夜起凌雲晨昏供養十餘年不替早歲攻苦博涉經史兼肆力於詩古文辭尤擅駢體主講東周書院合前後設教幾五十年門下多以

胡安定尊之性嗜酒飲酣輒與儕輩上下議論如數家珍

生平儉約謙遜族中貧無業者必給以謀生之資並量力周卹鄉里晚年部選鄉縣訓導檄至已歿著有鄉黨考念

餘齋文集三卷希素詩鈔二卷雲蘿記傳奇白雪譜子志

省采

志省字鏡吾號菊圃舉道光丁酉鄉試甲辰大挑授淇縣

教諭官學攻苦以文章鳴於時邑髦俊盡出其門鄰封恆數百里求學性莊嚴居家訓徒確立矩矱凜然不可犯晚生畏威每月半塗逃者然教澤所及以時騰驤雲路踵趾相接晚喜吟咏稿多不存卹嶺向植棉花鄉俗衰敝於盤

開時强悍者率衆劫掠志省翔社守望十餘村賴以安業  
鄉人至今祀之

采訪

吳遜

遜字伯謙布衣西村人資性穎悟豪宕不羈讀書寓目成誦有才子之目初涉放狂閱世漸深博通經史歛華就實抑然自下咸豐初粵軍北來皖匪繼之公議築寨自衛推遜爲首領衆賴以寧晚年益自韜晦斬除圭角墮然如父野老著有隨遇錄一卷

采訪

吳炳炎

炳炎字午亭胡坡村人舉光緒甲午鄉試少孤貧風骨峻

整刻苦自勵事慈親委曲盡致既雋鄉榜聲聞日噪勤勉倍加恆至咯血年未三旬而卒采訪

曹大聲

大聲石板溝人有至性乾隆辛未母疾瀕危大聲惶懼無策默祝神以身代母漸瘥次歲大聲赴天壇山進香果登捨身臺投巖下殞命及旅櫬旋里士女塞途遠迎布奠傾觴涕泗交頤百餘年來人猶嘖嘖蓋亦愚孝云采訪

孫金鑄 經天禎 劉元林

金鑄傭耕無耦積資爲弟授室嗣弟偕妻別居並因歲荒遠逃及旋金鑄仍與合爨更爲弟子成室已則鰥居自若

天祐寬厚好義有族子少孤天祐撫養成立爲之婚娶兼助近族婚嫁者數人元林操舟爲業家小康光緒丁丑大饑有族姪窮無依元林呼與同舟共度時荒並爲娶妻同居二十餘年元林歿其子贈之一船而去元林益家窩人

金鑄天祐並羅莊人

采訪

孫學聖

學聖字德庵羅莊人事親極孝暑月建涼亭揮扇驅蚊蠅不使近同里某叩攜其貲懋遷匿金自肥詭言貨沈貲喪學聖領之不深究采訪

謝熙 李景泰

康熙元年二月  
熙早孤奉母篤孝及病風痺身負出入者且十年少嗜酒  
因侍母病滴瀝不沾唇母劬哀毀切至里闈憐之景泰純  
孝竭力悅親歲歉進膳必豐潔親曰荒年穀不易得況廿  
且適平後居喪動準諸禮觀者悅服采訪

劉涵子天衢天澤孫凌漢曾孫萬尋玄孫心濬雲  
維永

涵號灤川太學生神堤人讀書敦行以孝友教家節儉中  
制和氣藹然里中桀傲子弟畏見其面以孫凌漢貴賜贈  
文林郎子天衢天澤采訪

天衢字德平幼業儒爲文有奇氣以家貧故服賈供養性

厭奢華自處以約親族有急量力佽助受託納交必誠必  
信人有過不面責乘閒婉諭俾知改以子凌漢貢贈文林

郎弟天澤子凌漢

采訪

天澤字德遠家計蕭索兄貿易外出諸務獨任善事二人  
每食必侍側寒煖鹹淡務求適宜時或躬爲烹調夜則親  
展衾尋母老多病自奉湯藥晨昏不少離輒畫請代之不  
許父嚴厲家人多畏避天澤能得歡心雖遭謙聞頤受無  
忤晚年境遇坎壈處之淡然時以古人自勵

采訪

凌漢字星槎號椿園道光壬辰進士賦性誠篤爲學務實  
事親孺慕終身不少替居母喪盡哀生前所用帷幕几杖

茶鼎酒卮之屬三年中畧不移動服旣闋出入必稟命有  
事必祭告並嚴謹忌日有年部檄下捧而泣悲祿養不逮  
也有胞叔久異居復迎與合爨事之如所生教諭馬時芳  
重其行載入芝田隨筆凌漢少卽嗜學長益加摯嘉慶戊  
寅登賢書丙戌大挑二等選陳留教諭訓士以器識爲先  
諸生受陶鑄漸知砥德礪行值大河決繞陳留城凌漢日  
夜梭巡督守卒無恙壬辰捷南宮初補湖南桑植縣知縣  
縣中政窳俗倣賄賂公行蒞任數月輿情翕洽文教振興  
上官憲之調署安仁縣安仁政務殷繁胥吏勾結爲奸夙  
號難治下車後嚴施裁懲羣小歛迹治理蒸蒸日上卒因

直言讜論見嫉僚友兼之贛重刑獄常覺歉然乃請改教  
職選南陽教授啟迪後學一姐官陳留時統計服官二十  
餘年自奉儉約操凜一介及致仕惟圖書數篋而已其學  
以忠信爲主以禮法爲宗以濟人利物爲己任而道積厥  
躬尤得力於孟子之自反易簷前一夕病俗情訣墓自撰  
墓誌口授長孫囑勿參入他語生平不喜著作門徒親炙  
久錄其素日教言名爲檢身輯語又輯與故舊所作記序  
表銘名爲椿園文鈔若干卷季子萬尋采訪

萬尋字季繹號穉園少承庭訓書卷經目輒了於胸與仲  
兄萬彬相師友學識最一時凌漢教授南陽無虧役每會

同僚友萬尋隨侍以供茶杯煙筒之需如古隸子弟例同治庚午應秋試歸值母氏病旋卒未幾賢書捷至萬尋苦塊痛切藐若無聞里門有走賀者聞而輒返昆仲四人析產後萬尋獨完國課有年丁丑歲嚴族中有計窮鬻妻者賴尋得全鄉人有侵尋田園者竟笑置之一生恂恂謙沖以詩書自樂子心濬采訪

心濬字見吾號百拙縣學生早讀書擘精儒術制行謹嚴家素貧不益榮利和粹恬淡未嘗矜已傲物儕輩一見傾心間出雅誦滿座解願於家庭孝友外戚里族鄉一遇以誠暇則日手一編與古爲徒設教有年學者宗之從姪維

永采

訪

維永字壽山凌漢曾孫承累葉清芬孝友任卹從兄弟六  
皆鑽研經史半衣青衿維永獨繼父經商兼掌家政慈親  
歿厝柩里側每夕往哭見父則改容婉辭勸慰祖壠距家  
較遠某年葬親凡期功總麻十餘櫬解橐同時舉辦長子  
鎮華由統領漸躋省長維永剷除結習雅飭恬粹並折節  
好善接待親故和藹益加周急振乏惓惓不忘曾施三百  
圓贍守貞女士捐千餘金築莊頭橋工此外助寒畯濟貧  
者尤多不勝舉而自奉一守故常某年五旬有七戚友將  
爲祝嘏維永先期他避諭兒輩曰吾祖生日不祝吾何忍

獨異爾其節尤費以施困窮可也

采訪

張天申

天申太學生清易鎮人父早卒弱弟七齡恩勤撫養家務身任遊太學歸片紙不入公門邑宰梁高其行鄉衆久困差徭出爲剃釐並自蠲金數百兩里黨傳頌

采訪

馬應辰

應辰字時若歲貢生柏峪人持身嚴密鑽研經史觸目會心事親盡意承歡耆年弗弛析箸時伯兄食指繁厚贍祭田訓迪生徒往復不倦立身以敬爲主並以此教士同時

名宿高其文行

采訪

任起瑞

起瑞字開運縣諸生貌魁岸膂力勇敢父嘗遭誣被逮堂上嚴鞫將施箠楚起瑞踉蹌至呼曰此生員父也願代受杖知縣微窺之疑爲武弁旣稔爲儒士命之起乃應曰父跪子何得起知縣悚異之審得彼誣狀情遂伸由是名重一時爲人負俠氣遇不平事髮指皆裂輒以身抗衡不少卻顧平日治家持身恂謹自矢取與絲毫不苟采訪

丁思禮

父秀武

思禮字斯立父秀武字芳躅篤孝友親歿節序灌奠淚隨聲下事伯兄尤謹遇事咨而後行思禮及弟思智具至性

塾師亟稱之思禮娶傅氏弟娶曹氏匱金俱豐盈思禮久病之值父歿旣歛宣言曰嚴親棄養余忝居長兄家政分不容辭顧私財之蓄非爲分爨計耶不然惡用是區區者徒使此心不光明耳遂顧傅使出所有弟亦響應之使曹效嫂氏之爲皆罄所積獻諸母母喜移奠靈幃曰此正爾父之志能如是吾復何慮由是伯仲姒娣沆瀣一氣男耕女織基業大起有姊二已適人恩禮經紀其家始終不懈

采訪

邢篤敬父名世

篤敬字利遠父名世字振寰見義勇爲生平建茶亭修石

橋還遺金懿行繢繢篤敬少承父志讀書稽古事必準禮  
居父喪謂虞祭俗多疎畧乃詳究節儀踵行不怠所居舊  
有羅磯書院將就湮圮子孫恢復舊觀捐設膏火造就後  
進夾津口鎮因權度參差獄訟繁興又糾集諸紳力革其  
弊

采訪

魏相君

相君字國柱父歿母病廢數年藥餌奉養身任弗替仲父  
客死嵩縣無子躬往經喪扶櫬歸葬季父乏嗣使胞弟後  
之憐弟幼弱諸皆代爲措理

采訪

閻世才

世才字子俊小善店人少入貢監超邁拔俗雅慕奇節偉行有與談者賢高致者興飛神追竟日不倦父歿時節奠獻伏泣不能起二姊適王家計躬爲措辦居恒清儉樸素有餘不吝分潤嘗蓄藥儲藉以利貧乏或竟不索值采訪

張振緒 張振起

振緒字述之聰敏勤學十餘歲卽擅文譽孝親友弟內行超越諸女弟家室蕭索躬爲經紀生平慎儀容不以賢智先人族黨無間言振起家貧寢敝衣粗食以甘旨供親並優遇羣從自處於瘠采訪

韓天錫

天錫幼讀書父亡後母老弟弱生計日艱乃棄去初謀鑿山鑄鐵繼復牽車服賈不十年家室富塗兩弟依次成立母亦婆娑願慰及析箸以膏腴讓爾弟自取礲確以舊宅讓叔氏而偕仲氏構新居人稱雅量采訪

周長明 劉文望

長明字萬照少孤鮮兄弟有姊妹七愛敬周卹久而彌篤屬續時猶諄諄以是屬其子文望字含之事親生養卒葬拮据盡禮力之所能不遺分毫有弟持身不謹卒至蕩產弟歿凡事身任教養從子尤篤長明文望均國子生采訪

劉紹曾

紹曾字亢宗蘇村人父某經商蘭儀邑積貲四千餘金焚  
券不較病祖塈褊小劃增已田數畝紹曾孝友忠純與弟  
述曾愛篤乾隆閒洛水暴溢室廬傾頽號哭往視幸梁木  
撐支柱尚無恙剛負母出旋復霹靂作聲從兄某壓於頽  
牆急奔往救移時出險是役也母兄危而復安紹曾幾乎  
殆矣采訪

劉紹傑

紹傑字超萬附貢生城內人母氏白庶母李生紹法數歲  
而父棄世紹傑事母撫弟惟誠惟謹好讀書久困名場援  
例考授州同儉約自奉嘗貢助戚里婚嫁度貧不克償則

折其券

采訪

張琬 康雲桂 劉永清

琬字永佩事繼母極摯每外歸必備嘉餚餉母或值母不快則委曲將順作孺子笑語怡志以下食雲桂字芳五康店人例貢事母醇謹母張晚失明雲桂極意調治湯藥親嘗出入扶掖雖侍養有人晨昏不少離永清少孤貧設小肆於道旁有所得欣然奉母諸姊妹嫁後不時饋遺存問一生爛熳天真逕情直行鄉人藉藉稱其孝

采訪

任國儼

兄國佑

國儼佚其字副乾隆丁酉解試神堤人穎悟孝友胸無宦

情病兄獨瘁家務分荷其責臨潁教諭檄下擬辭不赴重  
兄命勉爲一行居三載鬱鬱不自得遂解印綬去薦紳爭  
留之終不應嘗謂案牘沈味遠遜家庭之樂性嗜飲酒酣  
輒談經論史淋漓縱橫聞者忘倦劉潛贈詩有云羣驚舌  
底波瀾闊獨抱壺中日月長兄國佑采訪

國佑字丕顯幼從師讀倜儻不羈嗣念親老家貧責弟攻  
舉業服賈宋梁間不數年積資充盈時出贏餘振卹急難  
國倣司鐸臨潁遇有疑難往返商榷以爲常采訪

焦元泰

元泰晦而失怙祖父母健在母氏截髮自誓養老育幼稍

長讀書持家博兩世歡諷誦機杼之聲朗徹戶外厥後旌  
表文檄到縣元泰建立貞坊仰答母德溫縣某堡舊有巨  
橋歲久傾圯元泰獨力重修采訪

張文海

文海海上橋人性醇樸敦友于析爨時兄弟皆貧甚厥後  
文海饒裕仲兄飲食衣服依以終身里有借資謀生者慨  
然賙濟負債稽償者概從寬假且曰此中風味吾嘗之久  
矣采訪

張尙仁子永祥孫嘉璧

尙仁字洛如居益家窩性慷慨胸懷高潔路拾遺金招其

人遺之友封邱縣孫某貧嘗厚贈之並經紀其喪葬設  
義學置田延師以廣教育子永祥

據己酉志纂

永祥字長發號樸庵樂善不倦置義田立社學嘉慶癸酉

歲大饑捐粟振荒代贖髮妻數人次年疫起復鬻產櫓殣

置義塚瘞之並修黑石關路及本村關帝廟以子嘉璵貴  
誥封主事次子嘉璧

采訪

嘉璧字子玉號禮蒼歲貢生內行篤摯父病瀕天請代母  
喪明左右供養不離側姊早卒遺三歲甥撫之成立甥歿  
又鞠其孀婦孤子成立始去生平助婚葬施藥餌卹孤賙

貧善行累贍

采訪

王九富

九富號藪民世業農兄弟四饑具幹畧事親順謹伯兄季弟夫婦相繼逝命叔氏兩子後之叔氏讓以遺產辭不受歲侵叔氏就食嵩縣屬護其孥數年不返九富不時斷炊供母依舊從豐鄉里齊譽其孝

王復治

復治性淳謹弱不好戲年十四喪父妹幼凡事咨母而行從叔母早孀乘復治不家潛攜子女改醮媒妁等遺以金拒弗受歲時存卹弟妹妹長迎歸遺嫁從兄某綦貧以時賙濟不懈采訪

魏可均

可均字定之郡增生塢羅人父夙病狂顛一日忽失蹤可均焦急四出探覓歷半載始晤諸嵩縣乃偕歸自是頃刻不離膝下可均少師魏士俊士俊官蓬萊曾跋涉千里往省時論多之采訪

孫熊安

熊安羅莊人昆仲三季弟出後遠支十餘年忽輟歸宗後取繼者恢復前議熊安惻然曰自弱弟去吾手足若折今幸完聚何忍再戕卒以田產什物撮而三析之不令返晚年曾設商屢外債纍纍券付一炬采訪

趙作軻

作軻字濟若例貢生堤東人孝事雙親親歿宅第不慎於火夤夜闔室譁噪作軻夢中應曰神主安在踉蹌驚起突奔至靈室省視火光已將延及血誠不閒存歿如此夙善病日恆閉戶臨帖繙書藉以頤養享壽八十有五采訪

李興良

興良王溝人同懷五良居四醇謹耐勞家事獨任三兄興詩得銳意舉業蜚聲譽序良有力焉析爨後季弟興邦業日耗興良亦唯之與阿適有償夙債者共金二百餘興良願以應得者畀諸季諸兄感其意均如所議季弟賴以不

匱采

常法義

法義號正萬太學生黃治人昆仲二值歲凶父虞給養不  
贍命析箸法義舉所得業悉畀弟弟不受法義堅以行之  
或勸取三之一終不應曰吾弟無他能此區區者敷養吾  
弟足矣吾顧不能別謀以奉二人耶乃經營商販不數年  
囊橐充溢世父某徙居內鄉去輦七百里因大疫世母及  
從兄嫂相繼溘逝法義聞訃馳往奉世父與旅櫬以歸養  
生送死儘力所能生平疎財仗義於里黨多所佽助嘉慶  
八九年歲歉振米數百斛有豪俠風

采訪

路元佐 路元哲

元佐例貢生堤東人以內行著鄉里出後仲父仲母蔡嚴  
慈並施元佐事如所生愉色婉容數十年無閒及蔡終自  
初喪至禮祭盡哀盡禮至事本生父母竭盡誠敬不因降  
服少蒂元哲昆季二父歿獨力營喪葬後兄子天耄無依  
迎歸奉養晚年恩賜純青衣錫頂享壽八十有二采訪

王興道

興道字中行七里舖人昆弟三興道最幼席先世農業兼  
事商賈基業日廓析居後伯仲家漸落乃頻蹙曰奈何以  
手足之親而令肥瘠頓殊寒燠不均也議復合爨量材授

事責其成功食指倍前家益饒裕厥後平分其產子姓得

各安業

采訪

### 鍾天保

天保太學生閻溝人兄弟四保最少家貧事母敬兄不怠三兄天林性儻蕩揮霍天保潛爲償負不令母知設屢經商共事者負債纍纍置不問人有急恆傾囊以助某甲負金五百忽病歿更爲衣冠殯之劉星槎爲誌墓表其事

采訪

### 劉漢輔

漢輔太學生神堤人事親跬步不違嚴冬親疾思食瓜急不能得焦灼萬狀夢寐中有指示曰某媒中財有瓜覓之

得以獻疾尋愈乾隆四十九年歲饑田中穫穀數石卽場  
中剖分鄉里嘉慶十九年歲又饑賙卹如前知縣以義賙  
鄉里額其門漢輔初從師讀晚歲經商嘗作庭訓詩勗後

昆采

楊天福

天福親老多病飲食維艱天福朝夕扶持左右色笑使親  
意解忘沈疴昆仲三析居時財產任弟擇取未幾季歿天  
福復招與同爨待子成室然後去采

武丹

丹字子尙恩貢生侯地人事繼母誠懇不懈少兄數齡服

事維謹晚病偏枯杖始能起猶省視如常馬時芳作脊令原三章贈之教授數十年研深經史門下多才俊采訪

雷中魁子殿安

中魁字瑞嵩七里舖人幼時父母俱瞽左右歡洽冀娛親心父卒後母善病數十年奉侍如一日弟克依山治宅第山頽掩覆家人勢甚危羣呆視不前中魁膝行乞救乃拯出得無恙嘉慶癸酉歲祲捐粟百石以活窮餓其他櫓礎埋齒贈金助葬善行累累知縣李以以仁存心額其門子

殷安

采訪

殷安字環三例貢生早讀書嗣因家務繁重乃謝章句家

本素封目乃父中魁高掌遠跖兼以食指日繁漸致中落  
然拯急解危削已益公仍綽有父風凡公共建築慈善事  
業輒輸鉅資襄助時或躬自經紀至雷氏宗祠則又惟力  
是視蒲伏恐後咸豐七年歲災曾捐粟若干石徧施貧民  
同里曹姓無塋兆割地三畝與之行誼爲鄉里所重

采訪

### 張川

川字濬九諸生漫流人教人重躬行不苟詞章父歿母九  
旬不敢遠遊設帳村中日夕就養采訪

### 邵皇極

皇極柏坡人雙親早逝王母鞠育成立比長事王母如所

生曲意將順未嘗少違凡飲食起居及枕簟衾幕等事胥  
躬自服勞終始如一尤精痘疹一方賴之

采訪

李曰信

曰信監生清易鎮人父病痿痺力供甘旨數年不懈析爨  
後長兄耄每食必共案及歿出資殯斂鄉鄰婚嫁不給者  
解橐以助歲荒貸穀甚夥旋折其券卒年九十有三

采訪

孫樹聲子沐恩孫友信

樹聲號樸庵國子生羅莊人怡怡孝養兩祝親嘏喪葬皆  
如禮倡建宗祠修村寨積倉穀遇事容忍從弟某跡弛蕩  
產誅求無厭稍不當意輒挽牛馬以去樹聲更飼瘠羸遞

之置不較後某鬻孤姪於僧寺樹聲贖歸養以終身子沐恩字波及內行醇美姊適劉家中落躬餽粟米濟之風雪必往晚年留心岐黃集藥方類編十卷孫友信采訪

友信字鏡吾號嵩麓光緒壬午舉人生有至性嚴操守內行綦篤歷主東周兩程書院所至有澹臺之目其學以戒欺爲本求實用爲歸私淑孫奇逢馬時芳篤信其學居鄉築村寨興義塾明鄉約積倉穀翔勦善社捐資救荒又率族人修墳墓葺宗祠廣祭田續族譜清季教育改革作新章八詠以見志鏘戶著書不應外聘名所居爲耐寒齋自號耐寒道人著有周易集證馬氏心書注樸麗子注一得

錄耐寒齋詩文存稿若干卷采訪

孫學易

學易字詳三恩貢生羅莊人幼極貧從父授書深自刻厲往往日不舉火而誦聲不輟弟因賈販負債鬻已產以償淡薄宦情殷殷垂教門下傾仰尤深

采訪

劉世臣

世臣字作鄰少讀書旋事農商爲人豪邁熱腸親歿情文備至劉氏族姓蕃衍藉春秋祭祀以昭典禮以肅羣倫嗣緣田租生嫌波及全體諸凡頽廢世臣首出整頓秩然有序遇鄉里婚葬皆恃爲表率事舉而資不濫及卒羣立豐

碑誌思采  
訪

劉守身

守身字子敬有才具重骨肉同懷七人仲弟外皆繼母所出守身友愛備至躬自劬勞優養全家又虞羣季逸諺爲之各擇一職獨令六弟讀書納粟入監弟等無不敬佩采訪

劉柱子 李須

柱子癡丐也益家窩人父卒兄棄母不顧母老且病柱每負以行乞口所得擇旨食母自咽粗糲時或枵腹必求饜母恆棲止於石灰廠龍王廟一夜睡酣忽若有撼之者柱急起心動移母他處俄而羅水暴漲平地深八九尺廟址

旋被飄沒柱與母得無恙時同治九年六月二十三日也

人共呼爲癡孝子云

采訪

丐夫李須者不詳其居里城西龍尾村有坂極斗峻坎坷  
磐礎行旅苦之須每日乞討暇荷鋤修治數經寒暑竣事  
遇夏月山水發路輒復損壞須以時蕩平不懈須歿後村  
人樹碑志感時在光緒七年

采訪

張子雲

弟達原

子雲字蜀亭監生乾溝寨人貌晳而長聰穎有至性弱冠  
知詩經商學東與李慕白易賓臣時相唱和學識益進每  
以父歿未親含歛抱憾不釋及葬匍匐經畫心力交盡遐

邇羨歎事慈親能得歡心妹適馮而貧經紀其家無微弗至與弟逢原友愛綦篤咸豐閒倡議修寨寨成而捻匪至避居數百家咸獲安堵卒年三十八弟逢原

逢原字時來郡廩生沈靜寡言學重躬行歲科試輒列優等痛兄早歿灰心進取事母依依孺慕同治初郡舉孝廉方正以母老謝不赴老人岑寂摘錄興趣故事有關孝義者諷誦娛母病時醫藥卒時歟殯竭情盡禮成哭母二十四章以哀毀甚後母五月而卒年四十三子南陔舉人采訪

孟清一從子繼盛子繼鄒

清一字涵萬恩貢生黑石關人資性卓越孝友夙著從父

早世母氏節凜冰霜清一先意承志事如所生咸豐辛酉  
捻匪跳梁清一倡修寨自衛首蠲地址贊財躬率鄉團防  
堵村衆感德事後額門曰黍苗陰雨歲歉貸貲數百千折  
券不計子繼鄒繼潤從子繼盛采訪

繼盛字子隆太學生孟氏於輩爲義門世澤綿延繼盛孝  
友性成讀書能得其大理家廓然大公六十餘口無閒言  
光緒三四年歲荐饑繼盛開倉振濟櫓罐叢瘞災後酌分  
穀種令得樹藝戊戌洛水泛溢禾稼淹沒繼盛種菜多畝  
贍給窮檐自是歲以爲常所居北倚邱嶺施地十畝設茶  
亭以飲行旅每以長傲縱欲誠子弟而斷斷於小惡小善

於齊家之道三致意焉子廣信戊子舉人候選教職采訪

繼鄒字肖魯監生天性純篤尤謹內行事親敬兄懇惓備至全家數十口內外諸務綜核靡遺尊崇師儒嚴課子姓居常兢兢惡盈戒奢早歲研精醫術經診治者每獲奇效特慎謹過當不輕拈筆弟繼泗諸生現年九十餘歲采訪

周誥子作霖

誥諸生漫流人弟某出後長門業盡蕩誥平分所有以卹之子作霖耿介不羣光緒戊寅歲大饑作霖舌耕自給盡以田宅讓弟俾度荒弟廉直出售災後例許歸贖作霖置之不較采訪

郝衍五 李獻璋

父亨甫

衍五迴郭鎮人篤孝行日侍親側母病衣不解帶者八月  
光緒戊寅歲饑賑濟鄉里被澤者衆嗣又創修宗祠獻璋  
字士傑父亨甫饑於財喜推解人呼長者獻璋紹先志輸  
資修宗祠並刊世系於石昭穆秩然采訪

宋兆蘭

子輅

兆蘭字芳山縣學生宋村人姓沈號饒智畧未冠喪母侍  
父飲膳料理調劑在在注意時或下厨自饌繼母自來歸  
肩少卽嗣連添兩弟狂喜曰吾自此有手足也得馬時芳  
所著名書歎爲有用道學致力益堅年未四旬遽歿士林

惋惜子輅

采訪

輅字小山爲人恢豁多智無小儒齷齪態家故素封兩世  
慈親皆早逝父亦旋亡王父在堂輅弱齡經紀其閒綽有  
餘裕光緒癸甲之際興學救國輅謀諸劉蓮青王敬芳宋  
經裕諸同志創立學校於石窟寺遇有缺乏皆取之宮中  
旋復開鑿煤礦以裕經費織造之初煞費苦心未幾率衆  
毀校之事起縣令與羣小將羅織大獄輅旣感蜂蠭之螫  
轉念梗頑難化爰北上京師南遊滬瀆下帷攻苦冀學成  
而後問世然悲憫之懷未嘗一日息也丙午正月■日感  
時傷事竟投縕於上海中國公學一腔熱血無處揮灑哀

哉一生磊落光明與人交肝膽如見一時名流多歸之訪

采訪

孫應午

應午魯村人早喪父奉母甚謹伯兄揮霍蕩產因貧析箸  
應午幼時曾紡棉度日及長充東站某商經理生計漸裕  
而遇兄益恭營商所獲與兩兄嫂共用不私所有若還自  
遠方則行李逕置兄室任便取攜絕不知何者爲析居伯  
兄子幼應午爲之籌畫俾操正業有所需陰自輸之不令  
兄知而兄反時與爲難動見辭色應午始終敬禮不少衰  
最後患沈疴每飯必呼兄共食否則不舉箸如是者兩月

卒年三十有六

采訪

劉延傳

延傳字薪甫幼後伯父生父母相繼卒遺妹一弟二撫育委曲周至教養成立暑夜弟卧戶外恆抱置卧榻喚咻護惜及就外傳省視益周所繼田產頗豐終身與弟同御無畛域見人以爲難采訪

祖思恭

思恭蘇家莊人景祥長子後伯父開祥性孝謹事親無違民國元年正月初七日有草寇十餘人自晝劫開祥去思恭聞警倉卒操刀往至村外距賊僅數武大呼曰捨我伯父賊槍擊思恭倒地復起連呼槍連擊遂斃時年三十五

歲賊見恭死乃捨開祥去

采訪

張星耀

星耀字普照監生清易鎮人幼後伯父生父新甫與族某有隙某築家庭微嫌峻新甫嫂楊氏訴訟並賄知縣張世樞違法判斷新甫含憤經樹下星耀星夜詣縣鳴冤不得伸乃匍匐控省終至刑部歷年餘仍下豫撫提訊巡撫倪文蔚鑒其孝允爲懲奸勸諭息訟案遂結先是父死非命母旋卒兄嫂早逝均停柩星耀積貲營葬並收養兩猶子授室後始別居民國九年卒年六十八

采訪

孫作琴

作琴羅莊人業農醇謹質樸曾出資營商每次數百金或  
千金不等其人詭匿不償作琴置不較助族人婚娶助親  
串殯斂尤夥輕財好義冠絕一時采訪

張名世 任治邦

名世瑤嶺人性寬厚喜賙貧乏修橋梁乾隆四十三年因  
旱災大吏頒糧借民至秋償食者三十餘戶名世躬代完  
納鄉人勒碑志德治邦忠厚樸直遇族戚多恩禮屢捐資  
修葺橋路采訪

崔世超 康根

世超白沙人遊嵩陽一嫠婦泣於途叩之則因貧改適有

子難割也解囊付金不通姓氏而去根農家子買于姓女  
待年爲妾未幾妻舉男喚女父遣之其人感激無地采不訪

### 王天經

天經王家河人事繼母以孝稱嘉慶十八年歲儉叔母饗  
殞不繼天經迎養度荒並廻卹諸從弟遇鄉里困乏不憚  
再三接濟晚歲精痘醫采訪

### 王朝選

朝選字擢雅號尚義縣諸生白沙人性穎異於舉業外致  
志聖賢之學乾隆五十一年歲荒餬口無策適卹姊妹招  
養於家家人頗厭之朝選去寓村廟中三日不食病莫能

興倏一人欣然入曰吾能活公扶以起朝選詢之答曰刻  
有張某欲出妻爲書退休契準以三千錢爲壽朝選罵曰  
若何以不義教我人生皆有死吾豈以三千錢斷送子孫  
之生機耶子仍還我卧狀其人慚而去越三日遂斂馮安

常爲作傳

采訪

### 王玉章

玉章海上橋人兄早世遺孤二歲養育顧復維謹喜施濟  
道光二十七年歲凶知縣設局救荒玉章捐粟助振別出  
積穀散布鄉里知縣以樂善好施旌之

采訪

### 路元瀛

元瀛字登州堤東人生有雅量家素饒裕遇弟極厚有姊五依時資助漸趨小康鄉有侵其田者任所指爲界嘉慶十八年荐饑出資散布不書券

白雲青

雲青字昂夫七里鋪人家世席豐性恢豁喜解厄蘇困族戚鄉里時承膏潤道光癸丑江南大饑雲青輸千金助振有司上聞勅准建坊旌獎乙巳秋黃河漲溢產沒賦累民衆呼籲豁免按畝收費貧者無力應事幾寢雲青代出資五百千不責償並創青雲義學霑丐窮檐子弟生平好文士喜藏書曾刻十三經集字三才秘鑰館閣詩數種采訪

劉應辰

應辰字樸齋監生神堤人性友愛姊適崔家貧不時饋遺分潤爲甥延師訓於庭視若己子並賙親串中貧者俾無凍餒憂嘉慶癸酉歲大饑出粟數十石助振縣令李以義賙鄉里額其門道光丁未餓莩徧野復捐資掩埋卒年七十

張恬 張正蒙

恬侯其字通渭知縣乾二之孫清雍正六年黃河北徙溫民鄭相喬等率衆過河霸佔輦地恬赴省控告與鄭相喬擣距有年直至乾隆五年巡撫雅爾圖受賄左袒褫恬衣

巾提輩知縣張雷光帶案晉省嚴刑取供恬懼立斃杖下  
含冤誣服然因受杖過劇身無完膚旋里未久卽卒明崇  
禎間有張正蒙者不詳所居村亦因溫民過河佔種與溫  
李紹膺互控撫部迭經省委查勘巡撫越嚴斥溫民不準  
尺寸侵佔案遂結恬等均因公訴訟不避鼎鑊身被鉅創  
居民皆戶而視之

康無逸

無逸康店人同治初繇例貢保舉孝廉方正家本素封輕  
財好施光緒丁丑戊寅閒出粟助振救濟一方嗣山東水  
災鄭工決口各量力佽助邑城久圯曾捐千金爲倡虎牢

關修道解囊資助晚年施地十數畝籌設義塾寒舍兒童  
得以講讀

鍾天眷

天眷字乃西號欽若培灣人具夙慧有藻鑑藹然孝友不  
立崖岸亦不苟同道光丙午連歲荒旱出廩救濟其父賈  
於祥符黃陵集歇業後夥友負欠鉅萬天眷悉焚其券還  
所質業以子世隆貴封奉政大夫采訪

王西揚

西揚監生張嶺人有肝膽饒智畧道光年間汜水無驛站  
凡遞解餉鞘新疆遣犯以及過往軍流東由滎陽直達鞏

縣西由舞陽直達滎陽汜水全不接替路既遼遠事近偏  
枯兼慮意外西揚商之邑紳邀同滎陽分訴開封河南兩  
府終至撫部院卒如所請是役也纏訟經年艱苦不辭焦

澠鎮泐碑紀蹟采訪

袁謙六

謙六字叶吉羽林莊人家富饒儉約自奉敬師特優常置  
錢於塾中纍纍几案上以供師需遇減卽增閭里婚嫁無  
資者輒加佽助佃戶某葬母無兆指田付之不受值光緒  
丁丑歲授謙六釀村中富者以拯災黎又兩次解橐施賑  
里黨均霑實惠晚歲建宗祠修族譜捐資不怠子秀蕙已

丑舉人教諭伊陽采  
訪

崔大學

大學監生嘗經商廬氏道拾遺金慨還失主嘉慶癸酉道光丁未兩度出粟振荒鄉里被澤又代贖賣女配原夫叨惠者以義全倫始額其門

采訪

劉東松

弟子

元肅

東松字秀嶺太學生神堤人嗜善如炙性行豪爽道光丁亥近村山崩覆壓數十家東松奔走呼掠羣力猝集丙申冬大雪塞途村中柴米源絕人人自危東松擘畫調濟得無恙又天旱洛涸糴糴兩窮籌起新市於邙峯下藉以得

糧施振凡遇盤錯無不獨力肩任捍災禦難沐惠者衆村  
衆以繼志推恩旌其門弟子元肅性行酷類東松咸豐二  
年黃河灘地緩征捐資倡首粵軍抵鞏嚴河禁商旅不通  
元肅迭籲大吏往復跋涉耗費況瘁禁弛而閭閻以安里  
人刊石紀功采訪

劉世聚

世聚字協萃監生大黃治人性質直具風骨嘉慶閒征冊  
戶名五里錯亂民閒催科者往往有名無戶賠累恆至蕩  
產世聚僱王萬全控訴三年始經核准乃設局普安寺改  
造新冊徵收積弊一埽而空計自起訴至誠莊嚴數兩千

餘緝全縣士紳以德裨桑梓額其門嘗刊聖諭十六條藉訓闔黨鄉塾童子勤學者輒贈金以鼓舞之此外捐祀田設板橋刲茶亭收蠼蝗善舉甚多采訪

李森祿 常清和

森祿字景東倉西人捐田百畝儲作義倉哺救一村又捐田百畝於宗祠以供蒸嘗人咸德之樹碑道旁清和和義溝人宣統元年捐田十三畝刲立本村小學校采訪

姚新傳

新傳字一貫監生魯莊人爲人有膽畧樂施予少從同族丙曦遊咸豐之季捻匪雲擾士紳團結堵禦新傳隨丙曦

從事十方院賊勢甚張民兵懦不善鬪丙曦陷圍衆莫敢往新傳急呼曰吾師也單騎逕赴賊驚避乃以騎讓丙曦橫衝直撞得出險光緒閒兩逢災荒各捐金若干適王姓姊家食貧新傳粟米布帛餽遺終身卒年七十有一采訪

### 龐法

法西村人崇倫紀視期功親猶一體某年謀葬親欲併葬叔父母從弟某不忍厚累以故辭法曰勿爾葬費吾已預籌葬地我有田疇可任擇卒如所議清季曾捐錢施振采訪

### 吳酬和

酬和字希惠聖水人家初貧隨父入山墾荒効勸鞅掌確

瘠日闢漸卽康寧築室嵩高山陰之墓坡居民鮮少過客  
無所投棲每藉作東道酬和盡賓主歡雞犬桑麻質樸敦  
厚儼如陶淵明理想中之桃花源人多悅之以是名噪遐  
邇凡遊太室少室者屐蹤恆戾止焉時人有南吳北孟之  
譽可以知其概矣酬和雖業農而規範整飭倫紀秩然男  
婦數十口各安其職無敢違卽數歲小兒亦皆服從教誨  
和風所播感及異類某年有土寇虜至欲行刦一與之接  
胸懷倏變異辭而去且相誓曰吾輩儻禍及若主決非人  
類搆紳過客每贈以屏帳及書畫等事采訪

張若化 程秉乾

若化張嶺人秉乾程砦人均以拳勇著稱咸豐辛酉捻匪竄境若化拒賊於水峪村挺身搏戰互有勝負卒失利賊投戶於河秉乾堵粵軍於仙家店鄉團潰獨力禦戰亦遇害鄉人痛若化因公捐軀列事上聞勅賜七品銜准世襲光緒末知府文悌題秉乾入昭忠祠采訪

李顯白

顯白字丕卿邑諸生性沈毅喜任事所居迴郭鎮係縣中要區顯白歷任地方公務不懈勞怨維新以來醵金開辦工業學校附設實習工廠以本鎮大王泰山兩廟爲校址當時風氣閉塞繕造極艱因經費不敷謀提蘇村玉晨觀

廟產激起暗潮某甲糾衆反抗毆傷頭部數月始愈額角  
終留傷痕而顯白卒無退志民國初呈請墾宋陵荒地作  
工校常費值國家舉行選政長吏委爲縣自治籌辦員宵  
小仇忌愈深暗嗾匪徒於四月二十二夜在本鎮商店誘  
出擁至洛崖立時身首異處越二日遺尸漂浮家人始獲  
收斂時年四十三歲也生平所辦警察清鄉平糶各端遺  
愛猶存終至爲公捐軀鄉里哀之采訪

李心鏡

心鏡一名鴻緒孝義人幼聰敏八歲就傳倜儻不羣每聽  
講默不一語而至理要義能以意會家貧年十五赴汴習

商常以政治不平等爲憾辛亥武漢起義各省響應心鏡  
年二十八督力方剛由同里王天傑介紹入革命軍聚同  
志密謀起事奉派出城與駐軍聯絡約定十一月初三日  
夜舉火爲號屆時火未發心鏡卽率同志數十人沿街大  
呼曰我輩係革命軍爲民衆解除不平等政治也因事機  
早洩巡防營布滿街巷卽被捕遇害妻石氏子二采訪

### 崔德聚

德聚字懷仁白沙人少有大志舉止不凡七歲入塾卽知  
奮勉家雖貧不以境累心旋棄學業商汴垣年二十二爲  
號中領袖旋入仁義會力倡種族革命所得贏利盡充會

費辛亥秋武昌革命軍起各省景從汴中同志成立革命  
機關德聚率仁義會數百人加入約十一月初三晚舉事  
革命軍司令張鍾端命李幹公出城招待仁義會不意事  
機早洩與仁義會首領王夢蘭等悉被逮初六日在南關  
遇害時年二十八與張鍾端等十一人叢葬一處

采訪

### 王天傑

天傑字超萬城東人生而穎悟好讀書家貧輟學因族人  
某在滬辦中國公學始遊學海上學識大進爲人尙氣節  
見清政不綱語及國事輒激昂憤慨謂非革命難與圖存  
嗣歸豫入汴垣圖書公司日與留日學生暨諸志士過從

甚密辛亥武漢起義各省響應中州寂然天傑恥之聯絡各界肆力運動又隻身赴潁州歸德等處潛約仁義會衆定期舉事到者數千人洎十一月初三夜被逮供認革命軍敢死隊隊長不諱清吏詢以敢死隊作何事答曰殺盡漢姦保全同胞建立共和民國不幸爲汝等所獲惟求速死以成吾志初五日晨與張鍾端等同遇害時年二十五

采訪

劉建申

建申益家窩人少習舟楫生涯旋棄去効力伊闕南煤礮辛亥光復之役偃師楊源懋新蔡劉純仁等聯絡嵩洛多

數健兒爆發嵩縣建中從焉數與官軍轉戰崤函陝虢閒後隨劉純仁與官軍議和同時遇難新安之鐵門時年十九歲

閻作霖

作霖字潤蒼北山口人性激烈作事勇敢不畏險阻民國二年畢業陸軍學校廁身國民黨竭蹶奔走詎機事不密竟罹法網臨刑猶慷慨宣布宗旨浩氣凜然時方二十餘歲云采訪

李玉田 吳占魁 鄧子奎

玉田字秋濤東作村人郡庠生畢業河郡法政學校任地

方公務有年民國成立土匪蜂起玉田長芝田區迭襄縣長毛龍章督隊堵禦十六年八月登匪北竄所至焚掠人自危玉田率鄉團往剿躬踞金牛山顛被匪包圍授首士諭傷之立碑紀事園丁吳占魁隨玉田同在牛山包圍中事急玉田知不可爲頻叱占魁使速去占魁義不獨生依戀抗護力戰而死采訪

子奎常莊人古道熱腸遇事奔走調停力求解免輿論翕然任芝田區佐理員奉縣令調查災情遇賊城南五里堡斃命縣長同邑紳爲樹碣於十方院采訪

趙敬純

敬統字緒齋趙溝人父廣義母韓氏兄弟三敬統居季明  
敏豪邁能得堂上歡心家雖貧父兄不令輟學卒業高小  
校後升開封美術學校又轉上海美術學校嗣見國事日  
棘熱血噴涌不可遏遂竄籍國民黨從事革命常披露箇  
人主意有祖士雅中流擊楫之概聞者壯之民國十三年  
隻身走廣州入黃埔軍官學校期滿任革命軍某營排長  
漸升連長營長團長每戰皆身先士卒迭奏奇勳杭州之  
役竟至殉難時十六年二月十四日也年二十四妻李氏

無子

呂道立

道立字卓如和義溝人天資英異明敏好學卒業高小校後升開封培文中學立志遠大準擬留學歐美自入黨後校課黨務日昃不遑民國十四年入黃埔軍官學校期滿充國民革命軍連長南昌之役以一連抗敵軍二圍激戰三日夜卒能出奇制勝克復巨都旋任浙江防軍團指導員十六年任建國豫軍上校參謀兼軍士教導隊總教官繼任中央黨部組織部幹事十七年奉派爲方振武部特別黨部組織員後任國民革命軍第二師參謀十八年夏任河南軍事特派員公署軍事組織主任及韓復榘陝州班師後爲黃埔軍官學校同學會組織員兼開封市黨務

整理委員宣傳部長某年某軍反抗中央蔣總司令委爲  
河南軍事特派員率領同志秘設機關於開封鄭州洛陽  
潼關許昌彰德石家莊等處偵察敵情報告中央繼又任  
豫西民團總司令聯絡嵩陽一帶豪俠約於八月十日爆  
發詎爲敵軍偵破與副司令姬漢棟同時被捕道立顧全  
友誼給曰姬係親屬無與我事姬因乘隙脫身道立解至  
羅王旋卽就義時年二十七歲

劉毓堃

毓堃字簡甫益家窩人家世業農性弘毅有俠風少簡重  
不苟嬉戲里師器重之弱冠由縣立高小校入濟汴中學

畢業後創辦本鎮四育小學民國十四年教授於鄭州青年會值民軍北來奔走豫陝蘇鄂閒鼓吹宗旨履艱蹈危不少憩迨革命軍成功乃歸里到處講演黨義棒喝軍閥罪十七年三月某匪襲孝義兵工廠因仇嫉革命黨繫毓堃父並炮烙其族弟某毓堃私自籌度人情險曠虞父母年邁受累遂佯作祈居狀態赴汴任朝報社編輯嗣任上蔡縣黨務指導委員某年某軍違抗中央受命作秘密運動在鄭被捕拷審極慘終不少屈七月二十八夜就義於鄭州西門外時年三十一歲娶王氏子一尚齒

王一元

一元王家溝人少喜談兵效古人農兵制耕耨餘暇習手  
標戈矛藉嫋進退折衝用鎗尤善明季登封李氏爲寇遣  
人誘之以疾辭顧名震一方遠近莫敢犯後李氏黨羽已  
成迭入輦境劫掠九山東溪一帶而瑤嶺羅川爲禍更烈  
獨王家溝杳無賊蹤一元力也卒於康熙三十年壽八十  
餘采訪

李榜

榜字名列小相人尙任俠喜功名家素封裕送任地方團  
長排難解紛一秉大公十餘年鄉無訟牒曾代貧民納賦  
累費至七百餘金咸豐五年趙城巨匪曹德齊糾黨肆虐

勢甚猖披榜率衆抗擊卒禽之縣令孔旌其門曰義靖邪  
氛後六年捻匪竄輦榜復率民堵禦於山小關不挫不撓  
上嘉其忠勇錫以五品軍功采訪

崔繼澤

繼澤白沙村人幼習技擊有膽畧健步趨投効總兵崔廷  
桂旋歸袁葆恆部下最後從袁世凱遠征甲午之變世凱  
督師三韓繼澤仗劍先列叱咤前驅所向披靡事平以功  
先後保擢千總並加五品銜卒年三十袁世凱誌其墓采訪

王淮 寶發榮

淮佚其字醫術特精遇貧輒施藥並賙以粟帛歿後會葬

者數百人皆平日所活者百餘年後有竇發榮者字培元  
曹寨人精岐黃名噪遐邇每日扶老攜幼雜遝其門或馳  
騁於途日不暇食或勸以索謝滌其煩發榮笑置之采訪

張性仁

張醫士益家窩人少孤貧寄身釋門大僧名之曰性仁每  
晚篝燈誦靈樞素問夜恆達旦後得仲景傷寒金匱各書  
益肆力不懈遂以其意診療各病應手立效性醇厚不受  
資謝親歿終身不飾采數數負米四百里瞻其兄兄逝竭  
所有厚葬之兄子貧躬爲授室采訪

曹建福

建福字符五少具用世志嚴於自治徧謁曹鵬翊焦萬年  
胡芊秀諸前輩浸淫於經史詩文性理各書及親歿乃專  
力醫術初讀靈素漸泛濫河閒東垣丹溪各家終乃守汪  
訥庵之學而精研之一時洛岸南北賴以息默補創者踵  
趾相接然相知深者終惜其以小道見未得大展經綸耳  
采訪

李興詩 白九如

興詩俊秀嗜書學有心得中年因勞致疾親復疲癃乃棄  
而研醫造詣日深遠近賴以全活九如家富饒精外科志  
存濟世樂此不疲遇貧乏則周濟之或助以藥資子古勳

能世其業與詩字可之邑諸生九如號孔固武庠生居石  
關采訪

蕭寬

寬諸生廻郭鎮人博學能文工翰墨尤善行草瘦勁超脫  
取法在唐賢以上嘉慶閒闢別墅於嵩陰名曰星聚亭嘯  
詠自適有星聚亭記石刻并題詩書法流傳者少采訪

劉復性 畢誠之 王夢魁

復性善醫兒科尤精每當痘疹盛行沿門診視日歷數十  
家勞瘁不辭謝金概卻不受誠之亦精痘疹志在濟世勤  
儉謀生不名一錢兩人聲聞洋溢里巷噴噴不置夢魁工

小兒科起死回生屢著奇效鄉衆以道接叔和額之訪

采

張光先 王登甲

光先字繩武祖父兩世皆精醫光先續先業能窺奧妙所至立效登甲王溝人因母病習醫藝高性洽有請卽往均不索謝

采

孫德彰

德彰字韞玉魯村人早承家學習醫別具心得病者以得診視爲無憾敦請無虛日德彰亦熱心濟世了不憚煩兼精堪輿家言

采

康漢章

漢章字希疇康店人繼父業以痘疹著稱每值天痘流行坐不安席病者經一次聘請餘卽按日往視每晨出由近及遠無親疏貧富日必一周至病瘳始已嘗橐貯餅餌過寒室不輕留飯疏食未嘗不飽聞遇奇窘無力備藥者恆

資助之

采訪

孫崇樸

崇樸七里舖人工醫術熟於方劑有聘卽往無朱門蓬戶別凡經診治鮮不收效兒童走卒皆知名操守廉鍔不受餽遺或強之卽艴然不怡

采訪

孫作生 馮安瀾

作生字活字業醫善治熱症及痘疹等著手立效周旋鄉里五十年全活極夥歿之夕聞者罔不流涕安瀾字普慶遊定陵得眼科專書晨夕玩索抉其妙諦診治立效采訪

曹德澤

德澤字育萬號蕙庵又號蓮山太學生洛口人嗜學能文應試不售輒而習醫藝術曰高診視立愈著有衛生提綱數卷兼工書法名冠一時采訪

王永彥

永彥字子俊號杏村居城南新溝村先世以醫鳴永彥踵理舊業所詣日高每自門外若市復周旋四鄉慣已沈疴

不曾索謝時或製丸散濟貧鄉里堅碑彰之

采訪

### 馬炎午

炎午字友文號九坡同治壬申歲貢南侯人少有夙慧過目成誦家世業醫炎午亦留心不懈積久藝成光緒十一年教諭孟縣值瘟疫流行觸手奏效聲聞重一時及去官土紳祖餞道旁數里不絕

### 賀立志

立志字心農號靜齋車園人少習醫所得已深而自信不果光緒戊寅疫癟大起死亡相枕藉慨然曰此不容坐視也乃悉力診治拯救無量有饋送者卻之立志生兩月而

孤感母氏劬勞一生無忤顏時人稱之訪

采訪

韓超擢

超擢字英五諸生城南王溝人性嗜翰墨於晉唐來碑帖鑽研極深漸成家數名噪一時其書魄力沈厚氣象畧似顏平原而別有師承惜早卒

采訪

盧士選

士選字青臣號月川北官莊人由廩貢議敘教職歷署新蔡林縣獲嘉教諭衛輝府學訓導開封府學教授先世以醫鳴士選少多疾病屢患失血好瀏覽方書自療輒痊由是益加淬厲浸淫三指禪醫宗金鑑及徐靈胎陳修園等

書所得益深嗣設帳汴垣因丐求者衆移寓藥室以行其  
術素喜吟詩積久成帙著有月川醫案醉吟窗詩草規勸  
錄聞見錄別墅閒談等編采訪

王薰梅

薰梅字馨齋康溝人幼聰慧絕倫家貧無力具束修乃執  
厨學校乘閒肄書識字繼司船業漸操資經商籌算餘暇  
每孜孜於靈素暨他方書遂成名醫居常履綦盈門車馬  
輻湊他醫束手病症一經診視輒爲霍然因延請概係遠  
途每晨供給飲食座上常滿爲人溫文爾雅有儒者氣象  
晚年工書善畫蕭然自得常作擘窠大字采訪

邵應甲

應甲字春軒廻郭鎮人中歲習醫造詣日精用藥輕靈每奏奇效常救人於絲縷呼吸閒疾風甚兩遇請輒應鄉人稱頌不容口晚年家窶貧紡綿自給而操持慄然采訪

孟氏十世同居傳

黑石關附貢生孟繼泗十世同居駕唐張公藝而上遠近聞之莫不艷羨未審祖訓如何徽美子姓如何努力竟得此剛健中正鑾家族及詳考之亦皆庸行庸德無甚奇異蓋由高祖崇彝曾祖紹孔以來至繼泗而食指日繁田產日廣世以耕讀爲業類皆端慤和平才而慧者則納身黨

庶質而樸者則盡力隴畝治家之法一以恭儉忠厚爲本  
量入爲出人無私藏衣不曳綺儉自養廉嚴軌範於一室  
濟乏困於涸轍內外交修四方嘵嘵稱爲善人遠代遺德  
莫考其大父瑞南以案元入庠設帳鄉里數十年不受束  
金伯父裕清懷清分任家政迭延明師嚴課子弟功德最  
著父清一恩貢生文章精深見賞名流因世亂舉辦鄉團  
修築寨堡口碑猶存迨繼涸身羣從繁多壇篲競爽各展  
所長從兄繼盛胞兄繼鄒尤能恪守先規遞掌鎖鑰爲十  
世中堅人物以承先而啟後自此以降姪輩則有清光緒  
戊子舉人部選蘭封訓導廣信孫輩則有畢業河南法政

署理陝西隴縣縣佐昭楨署理潼關縣縣長昭權畢業河南法政昭材畢業北平平民大學昭本曾孫輩則有考授黃陂巡檢憲璵畢業河南法政署理新鄉承審憲琪玄孫輩則有畢業北京大學慶祚其餘或佐農功或習實業或掌公務紛紛効力當時例不得輕施月旦繼泗則皤皤黃髮耳聰目明九十餘歲之老諸生矣共和三年知事嵇炳元據士紳請轉詳上憲蒙政府褒獎題額表宅其時方九世今則十世云

按吾國制度以家族爲社會起點其家族愈繁聚處愈久者則其聞望亦愈高唐之張公藝宋之陳競因九世

十世同居聲施爛然後人攀仰莫及此非漫然也例如  
九十世之同居室中父老子弟概越五服以外血統上  
已較疏遠矣以血統疏遠之人儼然同爨其財安之若  
素其公德亦屬不薄設遇糾紛精神上必作一致趨向  
所謀易舉此事理之顯著者也反是以同胞昆季而析  
箸恆於蕭牆內操戈相向悍然不顧二者相比優劣判  
然矣近世歐風東漸彼土箇人主義與吾家族主義恰  
立於對地論者因樂小家庭之便或是彼而非已究竟  
於何取裁必有能辨之者

牛鳳山子瑄

鳳山字梧階清道光癸巳武狀元頭等侍衛歷任甘肅涼州中營遊擊加副將晉封總兵官得四世一品封贈因疾致仕咸豐間沙盤黃河灘地居民困於賦稅鳳山介賈知府臻轉詳撫院奏免衆村樹碣志感嗣捻匪竄擾率衆修虎牢關鞏固堵禦賊未得逞子瑄字荔庵同治乙丑科進士殿試二甲一名授翰林院編修工文善書時論翕然光緒丁丑大荒故人吳元炳巡撫江蘇瑄往訪擬藉以振濟鄉里事未諳病歿上海采訪

按牛氏世居汜水穆家溝至道光間鳳山大父巨川攜子六戊輩遷居鞏東二龍山明月坡是爲入籍之始然

因居汜日久明月坡又係毗連汜邑邊村樂冒汜籍曲  
遂聯舊習慣近年因清理縣界明月坡等村居民概劃  
歸鞏牛氏甲第蟬聯族望顯著咸同以來久已焜耀成  
皋沙河間事實詳載汜水縣志姑無論其爲鞏人爲汜  
人要其生前旣以汜人自任人亦以汜人相待現當斷  
代爲書還其舊隸而以清界後之明月坡認爲入籍紀  
元庶免兩志重複茲特附鳳山父子於後並敘經過云  
云

### 咸豐之亂

咸豐十一年八月捻匪劉狗王懷義等犯境知縣袁修翰

飭全縣民團分防各隘竭力堵禦並知府樊琨參將馬春  
華檄洛陽知縣任桂偃師知縣鄧爾復登封知縣章慶保  
各帶鄉團集黑石關西岸賊不得逞折而東竄是役也關  
係國家頗鉅破釜沈舟卒獲優勝縣中民團與匪決戰多  
次計共陣亡團紳姚振興等十五名村長白富潤等十名  
團勇白書香等二百七十六名禦匪有功團紳張力貞等  
八名宋瑞等二名村長李上林等十四名團勇賀逢恩等  
一萬一千七百二十名更有殉難婦女項背相望而匪之  
僵仆高萊則倍蓰於我矣事後十二月初四日知縣袁修  
翰將縣陣亡殉難紳民婦女暨有功團紳團勇等造冊詳

請卹獎同時御史劉毓楠將粵擒兩次陣亡殉難紳民婦女及鄉匪有功者開單摺奏懇請旌卹獎勵奉旨核准由禮部咨河南撫部院同治二年十一月遞行到縣惟縣署卷宗久失名字遺缺難於稽覈幸采訪所得與所舉成數相去無多爰就所可知者表舉其姓名籍貫以慰英魂若蹤迹久湮蒐羅無從亦惟聽之冥冥而已至於匹夫仗義  
卽臂當車當時未蒙贍卹事後付之雲煙更不知凡幾也

殉難團紳村長姓名

姚振興 王文舉小關人 馬金鎔半個店人 楊德成 楊文林 賀致隆 賀文興 張連枝 武肯堂 賀廣心

馬世奇

米河人

李金鎔

丁煥章

崔紹武

曹龍昇

紳

白富潤

賀杰村長

以上十五名追封雲騎尉入忠義孝弟祠准建總坊並專坊封贈一代賜雲騎尉世職襲次完時賜恩騎尉世職無替白富潤二名亦准入忠義孝弟祠建坊如例

殉難鄉民姓名

梁承周

梁鶴亭

李文靜

李文俊

李文彬

李常

爵

李常佑

李常欣

李常貞

李恭文

李成治

李法賢

李景祿

李喜林

李愛林

李俊林

李長

秀

李宗林

李福林

李松林

李玉貴

李玉令

李文元 李嵩華 李嵩峯 李培壽 李金祥 李迎

祥 李文學 李法成 李加祿 李誠有 李誠康

李新祿 李添祿 李治均 李泰華 李泰平 李法

昌 李法聖 李法誥 李法盤 李法乾 李欽文

李法振 李順元 李楓林 李勳祿

以上四十八人係咸豐三年五月二十日粵軍渡洛石  
關梁承周與倉西李文靜等率村衆禦於南河渡奮勇  
血戰同時殲命已於同治二年七月二十七日旌卹入

本縣忠義孝弟祠

殉難民團姓名

王玉瑩 王法 張保三 吳來 王金貴 宋二庚

宋寅 張得印 馬苟 宋毛旦 宋心年 宋石城

宋法鑒 宋法印 韓三 張洪泉 李性 丁元 張

桂林 王聚 宋東 宋驃子小里河二十二人 馬文照 馬

行賀 馬銅柱 劉復文 劉復體 馬金合 馬鐵拴

馬生 馬文燦 馬二羣 張復元 張景沂 張壽

馬雲行 吳子法 吳剛 吳鐵垂 馬三 馬合保

張培德 張輝科米河村二十一人 白書香 白六香 白

進香 白天聰 白天壽 白景星 白景芳 白景泰

白景德 白富有 梁文宗 梁丙 白玉潤 白溫

潤 白桐潤 白先正 白先知 白驥子 梁福元

梁炳文石關二十一人 賀廷魁 賀廷柱 賀寶同 賀崑

賀全義 賀朝珍 賀朝遴 賀應麟 賀三記 賀忠

賀泰 賀硼 賀根 張歡 白大寶寺灣十五人 吳景

仁 劉羣 劉瑞璞 劉瑞清 劉瑞安 劉永臣 劉

墩 劉大明 劉丙午 馬萬里 劉順德 劉合掌

劉聚劉武溝十三人 丁煥章 丁桂 丁法 馬二牛 馬金

鑑 丁十 馬景瑞 周章 馬景禮 馬廷柱 周卯

張宏林半個店十二人 李元玉 趙大黑 席發 李元一

潘二順 李金柱 李鰲 張冠 李創 周摩頭

甄喜成

邵水

迴郭鎮  
十二人

趙錫齡

趙進才

趙老官

趙殿琦

趙錫智

余法太

王保同

張三

草店村  
八人

張小三

曹戊辰

張林

曹五

田佳妮

茶店  
五人

房四

侯

曹振祥

杜小科

張二妮

杜昆

樊寨

李文興

李太松

張振河

趙保柱

張糞堆

竹林溝  
五人

李大

功

李大定

李大江

李屹意

竹林溝  
四人

周運元

升

周書圖

周爾耀

羽林莊  
四人

馬大貴

馬清林

五

兩河口  
三人

竇振清

王保全

王法

曹店  
三人

張丙寅

張文大

李傳

雙樓  
三人

楊百林

趙協元

王居安

老廟  
三人

人

李不動

周全

周明

莊和溝  
三人

孫海

孫太元

孫牛犢

孫寨三人

李金銘

李讓

鄭春

樓子溝三人

王書山

王協和

曹鳳友

東後莊三人

李福壽

楊元剛

李福

申小相

南侯三人

荆德初

南侯一人

王廷俊

南村一人

張廣信

程天

保程寨

水頭二人

馬天成

水頭二人

張二八

水頭二人

魏普太

王才

張堯宗

周太和

小關二人

張心海

袁新龍門溝二人

袁新

龍門溝二人

景豔

魯莊一人

費三旺

西作村一人

李清魁

東莊村一人

楊樂川

西栗林

雷坡村一人

雷雲岫

雷坡村一人

吳保成

西竹圍一人

曹振遂

要峪

寶福

新莊一人

馬修德

谷山一人

余學珍

柏溝一人

張元昇

張莊

曹溝一人

曹均

曹溝一人

張保拴

竹園溝一人

張保同

大峪溝一人

王留玉

張溝一人

張錫祚

張莊一人

趙漢清

趙寨一人

趙石柱

崔海　張旺保　自憲章

上四名  
佚其村

以上二百零六人係咸豐十一年同治元二年禦捻陣亡者戰地則黑石關十方院參家店山小關等處事後概被旌卹入忠義祠其籍貫則不盡詳因失檔案無從稽覈惟縣東南一部就戰歿地特建忠義祠春秋俎豆禦匪有功團紳姓名

張力真　白永清　任樹德　劉新華　韓秀芝　賀鉅

趙清如　康無逸　宋瑞　白松齡附村長　李上林

以上前八名勑授承德郎後二名授武畧騎尉均准建總坊並專坊村長李上林等十四名團勇賀逢恩等一

萬一千七百二十名准建坊如上惜名佚無從紀載

周九貢 周顯然 袁秀章 袁秉道 袁德升 袁喜

甲 袁丙科 周守禮 周正家 周安中 周錦標

周錦文 周義振 王法 周清山 周墨然 周宗德

周振魁 袁魁武 周丙午 周金花 袁一元 周

振顯 周士欽 周麟元 周清俊 袁法升 周扶清

袁書志 周恆元 周德智 周德曠 羽林莊三十二人

西作

十二人

魏

維新 南村人 楊浩然 王坡 王玉琢 路發聲 王

玉川 趙之璋 路文思

以上三十九人事蹟概未著錄據采訪冊申注有獎勵

武畧騎尉或六品軍功殆皆擊捻有功者

民國剿匪陣亡團丁

周占鰲 周新年 遵西侯人民國元年剿匪陣亡

白成 芝田園勇九年陣亡

鄭炎上莊  
村人 李戊甲 二人係團總

丁黑 田言印 田木 李金壯 裴盤

以上團丁九年陣亡

王川 王清 楊六成

以上團丁十一年禦匪瓦功川陣亡

趙秋桂 十一年禦匪陣亡

劉任 劉印 劉松召 劉竅 張三

以上因登匪王姜擾境陣亡密縣周家寨

韓運良 李金奎 牛坡 牛金山 司光 李二和

康同仁

以上十六年禦匪蟠龍尖陣亡

張東 曹斗 李銀庫 李明理 焦光道 曹集 張

賴貨 王呼蘭 王斗 賈三 王圪耐 李茂來 李

小五 張廷良 楊四姐 李五魁 王德成 丁良

丁三保

以上十六年八月禦匪瓦功川陣亡

吳占魁

附李玉  
田傳

曹泉水 十六年追匪遇害

趙占標

李昌齡

十七年禦匪瓦功川陣亡

吳改名

車園人十七年守寨被戕

流寓

附

漢

王元奕

元奕西漢人隱於侯山

在縣東南二十餘里

景帝每徵不屈遂就山

而封侯宋亮詩王奕拜隱侯

已酉志引  
芥隱筆記

後漢

潘勛

勗字元茂初名芝或曰勗獻帝時爲尙書郎遷右丞詔以  
勗前在二千石曹才敏兼通明習舊事敕並領本職數加  
特賜二十年遷東海相未發留拜尙書左丞其年病卒時  
年五十餘魏公九錫策命勗所作也勗子滿平原太守亦  
以學行稱滿子尼

已酉志引  
魏書注

晉

潘岳

岳字安仁滎陽中牟人父芘鄆鄉內史少以才穎見稱鄉  
邑號爲奇童早辟司空太尉舉秀才泰始中武帝躬耕籍  
田岳作賦以美其事岳才名冠世爲衆所疾棲遲十年出

爲河陽令勤於政績調補尙書度支郎遷廷尉評以公事免退而閑居於洛之涘

按水經注羅水又北逕潘岳子父墓墓前有碑岳父范瑯琊太守文選西征賦注家在鞏縣東在懷縣詩有顧鞏洛戀本之語府志載入流寓傳固自允當

潘尼

尼字正叔岳從弟祖勗漢東海相父滿平原內史尼少有清才與岳俱以文章見知性靜退不競惟以勤學著述爲事著安身論以明所守初應州辟後以父老辭任致養太康初舉秀才爲太常博士歷高陸令元康初拜太子舍人

出爲宛令在任寬而不縱鄙隱勤政入補尚書郎俄轉著作郎歷官中書令遷太常卿

唐

孫嘉之

嘉之博州武水人少孤依外家客涉輞閭垂拱初詣洛陽獻書不報第進士終襄邑令年且八十猶爲令子逖貴顯求降外官增父秩帝嘉納拜嘉之宋州司馬聽致仕旋卒

據唐書孫逖傳纂

明

吳謙 田和 馬宣

謙博學善屬文和性剛正崇尚節義爲鄉表正晚節尤奇  
皆永樂間教諭鞏縣因占籍謙歷任十二載休致江西萬  
載舉人和陝西崇信舉人宣山東章邱人洪武間以給事  
中謫洛口驛丞後亦占籍

清

童鉉

鉉字二樹山陰布衣才名滿天下工詩善畫精分隸各書  
乾隆丙申遊鞏洛知府施誠聘修河南府志鞏孝廉孫枝  
榮同事纂輯遂訂交曾於暑月寓鞏枝榮索寫梅鉉揮汗  
應之并題長篇有愛君自具冰雪文繞紙塵氛亦何益更

煩索笑一題詩儼然坐我梅花國之句枝榮依韻和之故  
二樹梅流傳輦境頗多兵燹後存者殆稀著有二樹詩集

張生馨

生馨字子香溫縣進士乾隆間主東周書院以古文提倡  
後進一時李廉孫枝榮孫文沼貢生胡芊秀孫同然諸名  
宿均執贊門下熏香摘豔藝苑生色其他接風沐澤頗不  
乏人爲翠山長巾之祭酒

王詵桂

詵桂字丹君項城布衣以文章經濟名於時李棠階張之  
萬盛稱其學與訂交咸豐間捻匪俶擾詵桂攜眷西來僑

汨水輩縣頗久倡議圍練席堅壁清野策以制流寇與邑  
文學閻梅張啟元友善並嫁二女於輩汨間後逾退知縣  
袁修翰稱爲輩東保障甚敬禮之所著有丹君詩文集行  
世

鞏縣志補遺

人物志

殉難民團姓名

劉河漲 劉梅 劉瑞安 劉墩 曹天奇 楊文林  
劉丙午 趙建明 楊太 劉太明 楊二勇 劉聚  
趙丙章 李當 李榮身 劉瑞清 柴起家 趙建侯  
劉瑞璞 劉永成 趙永祿 馬萬里 鄭圪抵 馬  
良丑 趙漏 劉順德 馬遂喜 李發財

右二十八人亦係咸豐間民團禦匪陣亡見蘇村忠義  
祠烈士碑原刻印遺茲據劉治堂校補惟劉瑞安劉墩

劉丙午劉聚劉瑞璞劉順德等見前係劉武溝人亦或  
其同姓名與姑附錄之

